

《衛風·氓》

《毛詩序》：

氓。刺時也。宣公之時。禮義消亡。淫風大行。男女無別。遂相奔誘。華落色衰。復相棄背。或乃困而自悔。喪其妃耦。故序其事以風焉。美反正。刺淫泆也。

原文：

氓之蚩蚩。抱布貿絲。
匪來貿絲。來即我謀。
送子涉淇。至于頓丘。
匪我愆期。子无良媒。
將子无怒。秋以為期。

乘彼坳垣。以望復關。
不見復關。泣涕漣漣。
既見復關。載笑載言。
爾卜爾筮。體无咎言。
以爾車來。以我賄遷。

桑之未落。其葉沃若。
于嗟鳩兮。无食桑葚。
于嗟女兮。无與士耽。
士之耽兮。猶可說也。
女之耽兮。不可說也。

桑之落矣。其黃而隕。
自我徂爾。三歲食貧。
淇水湯湯。漸車帷裳。
女也不爽。士貳其行。
士也罔極。二三其德。

三歲為婦。靡室勞矣。
夙興夜寐。靡有朝矣。
言既遂矣。至于暴矣。
兄弟不知。咥其笑矣。
靜言思之。躬自悼矣。

及爾偕老。老使我怨。
淇則有岸。隰則有泮。
總角之宴。言笑晏晏。
信誓旦旦。不思其反。
反是不思。亦已焉哉。

氓 六章 章十句